

V bo'lim. Bojxona ishida valyuta nazorati va tashqi savdo operatsiyalarining monitoring

34-bob. Valyuta nazorati

240-modda. O'zbekiston Respublikasining naqd milliy valyutasi va naqd chet el valyutasi olib kirilayotganda va olib chiqilayotganda nazoratni amalga oshirish

O'zbekiston Respublikasining naqd milliy valyutasi va naqd chet el valyutasi olib kirilishi va olib chiqilishi ustidan nazorat jismoniy shaxslar bojxona chegarasini kesib o'tayotganda bojxona organlari tomonidan amalga oshiriladi.

241-modda. O'zbekiston Respublikasining naqd milliy valyutasi va naqd chet el valyutasi jismoniy shaxslar tomonidan olib kirilayotganda va olib chiqilayotganda tekshiruvni amalga oshirish

O'zbekiston Respublikasining naqd milliy valyutasi va naqd chet el valyutasi olib kirilayotganda va olib chiqilayotganda jismoniy shaxsni tekshirish valyutani tartibga solish to'g'risidagi qonun hujjatlari buzilishining oldini olish, uni aniqlash va unga chek qo'yish maqsadida amalga oshiriladi.

O'zbekiston Respublikasi naqd milliy valyutasi va naqd chet el valyutasi olib kirilayotganda va olib chiqilayotganda quyidagilar tekshiriladi:

olib kirilishiga va olib chiqilishiga ruxsat etilgan summalarning cheklangan normalariga rioya etilishi;

olib kirilishiga va olib chiqilishiga ruxsat etilgan summalarning belgilangan cheklangan normalaridan ortiq bo'lgan O'zbekiston Respublikasining naqd milliy valyutasi va naqd chet el valyutasi olib kirilayotganda va olib chiqilayotganda

O‘zbekiston Respublikasi Markaziy bankining yoki vakolatli banklarning ruxsatnomasi mavjudligi;

jismoniy shaxsda mavjud bo‘lgan summaning bojxona deklaratsiyasida ko‘rsatilgan ma’lumotlarga muvofiqligi.

242-modda. O‘zbekiston Respublikasining naqd milliy valyutasini va naqd chet el valyutasini noqonuniy olib kirish hamda olib chiqish bilan bog‘liq huquqbuzarliklar aniqlangan taqdirda ko‘riladigan choralar

O‘zbekiston Respublikasining naqd milliy valyutasini va naqd chet el valyutasini noqonuniy olib kirish va olib chiqish bilan bog‘liq huquqbuzarliklar aniqlangan taqdirda bojxona organlari noqonuniy olib kirilayotgan va olib chiqilayotgan O‘zbekiston Respublikasining naqd milliy valyutasini va naqd chet el valyutasini olib qo‘yadi, tergovga qadar tekshiruv o‘tkazadi, ma’muriy ish yoki jinoyat ishini qo‘zg‘atadi.

(242-moddaning birinchi qismi O‘zbekiston Respublikasining 2019-yil 23-maydagi O‘RQ-542-sonli Qonuni tahririda — Qonun hujjatlari ma’lumotlari milliy bazasi, 24.05.2019-y., 03/19/542/3177-son)

Bojxona organlari O‘zbekiston Respublikasi Bosh prokuraturasi huzuridagi Iqtisodiy jinoyatlarga qarshi kurashish departamentiga O‘zbekiston Respublikasi naqd milliy valyutasi va naqd chet el valyutasi noqonuniy olib kirilganligi va olib chiqilganligi to‘g‘risidagi ma’lumotlarni taqdim etadi.

(242-moddaning ikkinchi qismi O‘zbekiston Respublikasining 2019-yil 15-yanvardagi O‘RQ-516-sonli

Qonuni tahririda — Qonun hujjatlari ma'lumotlari milliy
bazasi, 16.01.2019-y., 03/19/516/2484-son)